



江蘇省地方志編纂委員會辦公室 編

江蘇歷代方志全書

51



江蘇省地方志編纂委員會辦公室編



鳳凰出版社

江蘇歷代方志全書

51

蘇州府部

ISBN 978-7-5506-2317-0



圖書在版編目（C I P）數據

江蘇歷代方志全書. 蘇州府部 / 江蘇省地方志編纂
委員會辦公室編. — 南京 : 鳳凰出版社, 2016. 7
ISBN 978-7-5506-2317-0

I. ①江… II. ①江… III. ①江蘇省—地方志 IV.
①K295. 3

中國版本圖書館CIP數據核字(2016)第131080號

書 名 江蘇歷代方志全書·蘇州府部
編 者 江蘇省地方志編纂委員會辦公室
責 任 編 輯 王 劍 王愛榮 吳 瓊 顧 娟 崔廣洲
裝 幀 設 計 姜 嵩
出 版 發 行 鳳凰出版傳媒股份有限公司
鳳凰出版社(原江蘇古籍出版社)
發行部電話 025-83223462
出版社地址 南京市中央路165號, 郵編: 210009
出版社網址 <http://www.fhcbs.com>
印 刷 揚州文津閣古籍印務有限公司
揚州市開發區鴻揚路22-2號(6幢), 郵編: 211153
開 本 889×1194毫米 1/16
印 張 3253. 25
版 次 2016年7月第1版 2016年7月第1次印刷
標 準 書 號 ISBN 978-7-5506-2317-0
定 價 79200. 00圓(全九十九冊)
(本書凡印裝錯誤可向承印廠調換, 電話: 0514-87969255)

乾隆元和縣志(二)



(清) 許治修
(清) 沈德潛
顧詒祿 纂

第五十一冊目錄

乾隆元和縣志（二）	〇〇一
常熟縣概況	〇〇一
寶祐琴川志（二）	四四一

元和縣志卷六

壇祠

先農壇之特創也重民事也社之祭也土也稷之祭也穀也山川民所瞻仰也風雲雷雨祈豐年憂水旱也祭城隍幽有鬼神也祭厲憫無後也司牧之有專祠也功德在人宜報也鄉先生之有專祠也或尊其道德或仰其功烈或嘉其行誼所謂沒而可祭於社也粢盛醴齊或統於有司或不盡統於有司要皆得祀典之正而非

元和縣志

卷六 壇祠

一

淫祀也元和新建大事宜先故彙而考之著於篇俾有民社之責者知所崇祀志壇祠

先農壇在城內仁一畝相王巷內建於雍正五年守土官始行祈穀也先是雍正四年八月初九日內

閣奉

上諭國以民爲本民以食爲天朕卽位以來念切民依舉行耕藉之禮殫竭精誠爲民祈穀乃於雍正二年三月藉田登產嘉禾有至一莖九穗者朕心亦以爲偶然之事今據府尹劉于義進呈今歲藉

田所產自一莖雙穗三穗以至八穗九穗皆碩大堅好異於常時朕見之心甚慰悅特令宣示廷臣朕並非以此爲祥瑞誇耀於衆也蓋實有見於天人感召之理捷于影響無纖毫之或爽朕以至誠肫懇之心每歲躬耕藉田以重農事卽蒙

上帝降鑒登產嘉禾以昭休應似此八穗九穗之穀豈人力之所能強爲亦豈人君所能強之使有乎天人感應之理朕見之最真最切但恐此心不誠耳誠則未有不動者卽如從前青海蠢動朕爲邊陲

元和縣志

卷六 壇祠

二

憂慮虔禱宮中不數旬而捷音卽至疆圉寧謐又如前歲夏間近畿雨澤稍愆朕在宮中默禱減膳脩省虔誠叩懇不數日而甘霖大沛禾稼有秋此皆近年以來朕親行親驗之事至於去年夏秋之間時常陰雨朕在宮中但覺雨水稍多不知其大爲民患而李維鈞並不將畿輔被潦實情具奏是以朕竟不聞知未曾早爲虔禱殫竭誠心以挽天意而紓民困及蔡珽署直隸總督事務詳細奏聞朕宵旰憂勤幾廢寢食於是截漕發倉多方賑濟京

城設廠各邑興工俾窮民皆得餬口是以地方雖被水災而小民不致流離失所朕撫綏憫恤之念實爲迫切今歲二麥豐收禾黍暢茂此皆

上天俯鑒朕衷故加惠黎元而錫以盈寧之慶也蓋天生民而立之君鑒觀在上人君一念敬謹政事無闕天必嘉之佑之一念放逸政事有乖天必儆之戒之此一定之理也況人君撫馭臣庶位處極尊所以賞罰之者獨有

上天耳是以朕每於水旱等事皆實心內省必係朕有元和縣志

卷六 壇祠

三

過失

上天儆戒示譴也至於各省旱潦之事朕皆視同一體原無彼此之別惟是地方相隔路遠彼地偶有水旱有司未必卽行具報及至奏達朕前而緊急之時已過是以朕無從盡其誠心爲之祈禱此其責則全在本省督撫矣督撫受朕委任之重爲朕養育萬民必視百姓之疾苦如痛癢之在己身一遇水旱飢饉必思所以致此之由或因本省之政事吏治有闕卽思速爲改易之或因本地之人心風

俗不端卽思速爲化導之兢兢業業脩省祈禱竭盡誠心一如朕之朝乾夕惕斷無不可以挽回

天意者假若開朕之政治稍有缺失亦卽直言陳奏不必隱諱如此則官與民聯爲一體臣與君又聯爲一體太和翔洽實意交孚天聽雖高誠呼吸可通矣朕每歲躬耕耤田並非崇尚虛文以爲觀美實是敬天勤民之至意禮曰天子爲耤千畝諸侯百畝據此則耕耤之禮亦可通於臣下矣朕意欲令地方守土之官俱行耕耤之禮使知稼穡之艱難

元和縣志

卷六 壇祠

四

悉農民之作苦量天時之晴雨察地方之肥磽如此則凡爲官者皆時存重農勸稼之心凡爲農者亦斷無苟安怠惰之習似與養民務本之道大有裨益着九卿詳議具奏欽此 等公同伏讀

上諭欽惟我

皇上至德同天深仁育物朝乾夕惕時時以四海爲心盱衡宵衣念念恐一夫失所肫誠昭格於

上帝恩膏遍及於羣黎是以虔禱宸宮而邊陲之捷音卽至默祝

大內而寰宇之甘雨覃敷響應昭然纖毫不爽誠如聖諭所云天聽雖高呼吸可通者也至於截漕發倉近畿無虞荒歉興工設廠窮民盡獲安全是天地生成之功固無弗至而

皇上懷保之德實靡不周保合太和參贊化育運四海於一心視九州爲一體在昔所稱聖君哲后難與比隆卽古所謂盛世昌期孰能媲美我

皇上聖不自聖安愈求安念國以民爲本民以食爲天躬親胼胝之勞歲行耕耤之典是以嘉禾疊產

元和縣志

卷六 壇祠

五

九穗頻生異瑞奇微駢臻協應況今歲百穀暢茂二麥豐收閭閻獲樂利之休百室有盈寧之慶何一非

皇上至誠格

天之所以致也今後令耕耤之禮通於臣下欲地方守土之官俱行耕耤之典使知稼穡艱難農民作苦天

時晴雨地方肥磽仰見我

皇上敬
天勤民重農務本之至意有加無已洵從古未有之曠

舉萬世不易之良規卽宜恪遵

上諭通行奉天直隸各省舉行耕耤之典查督撫係通省大吏府州縣衛所等官皆有守土之責相應行文奉天府府尹直隸各省督撫轉行各府州縣衛所於各該地方擇潔淨之地照九卿所耕耤田四畝九分之數設立先農壇於雍正五年爲始每歲仲春亥日府尹督撫及府州縣衛所等官率所屬之員耆老農夫恭祭先農之神照九卿耕耤之例行九推之禮務須實心奉行以重民依其設立

元和縣志

卷六 壇祠

六

先農壇並恭祭先農俱令動支正項錢糧其所用數目各該地方官報明戶部查核耤田所收之米粟敬謹收貯以供各該處祭祀之需盛將各處設立耤田畝數令該撫報明戶禮二部存案庶爲官者皆以重農課稼爲心則爲農者自無苟安怠惰之習於國計民生大有裨益矣隨經通行至元和縣雍正五年建先農壇於相王巷南置天字圩壹百九十坵官田二畝二分二厘八毫又四百九十一坵官田三畝共五畝二分二厘八毫略浮於部

頒定額四畝九分之數 此元和得建先農壇之始

乾隆三年知縣事張若熾因舊制卑隘不稱且前此經營苟簡修役不時迺即先農壇故基詳 憲

改築牆之土者易以瓦階之傾者釐以石殿宇簷

楹之爲風雨所侵損者塗墍丹雘崇飾一新又移

建牌坊一座頭門三間正殿兩旁重構造配房二

間鳩工庀材共費朱提九十八兩有奇經始於是

年之七月初一日即於是秋八月初八日告竣是

役也因舊增新不獨規模式廓而工力亦視昔較

元和縣志

卷六 壇祠

七

爲完固庶可肅觀瞻而虔祀事焉

社稷壇在吳縣閭門外義慈巷實府社稷壇也宋置

子城西南四里元遷盤門外明洪武三年知府陳

寧更建於長洲縣石牌巷宣德八年知府況鍾移

至今所

國朝因之長吳附郭宋元時各有壇今與元和皆統

祭於府壇制累石爲之縱橫俱三丈高四尺二寸

凡三階三級前設拜壇高尺許東西三丈六尺

南北二丈四尺壇之西南爲神廚正南爲宰牲房

房之前爲水池府齋房二所縣齋房二所東西相

峙壇之內垣東西三十五步南北三十三步四面

皆塗丹外垣深六十四步廣六十二步門北出大

門一儀門三亦俱塗以丹石主二一埋壇南正中

一卧於地長四尺二寸徑一尺二寸神牌二高三

尺三寸題曰府社之神府稷之神每歲春秋仲月

上戊日三縣隨府官具祭如禮

風雲雷雨境內山川城隍壇亦府壇也在吳縣盤門

外宋置吳縣治西南四里元徙長洲縣葑門外明

元和縣志

卷六 壇祠

八

洪武間移置今所壇制亦累石爲之東西三丈六

尺南北三丈七尺高四尺二寸四面有階三級

壇之東北爲宰牲房房之前爲水池又前爲庫房

壇之東南爲府齋房西南爲縣齋房壇之內垣東

西三十五步南北三十六步四周俱塗丹外緣短

垣基凡二十四步前門一儀門三亦塗以丹春秋

擇日同壇設三神位各高三尺三寸題曰風雲雷

雨之神山川之神城隍之神舊制府官主祭三縣

陪祀雍正十年三月初九日欽奉

世宗憲皇帝諭旨行令直省府州縣修理 社稷風雲

雷雨山川城隍等壇以重祀典至

今上乾隆二年十一月初六日禮部遵

旨議覆社稷山川風雲雷雨等壇嗣後每逢祭期省

會之地督撫將軍都統副都統率令司道文武屬

員各按品級分班行禮布政司係地方正印官仍

令主祭其府州縣地方如有提鎮道員亦令各按

品級分班行禮府州縣正印官仍令主祭又行令

郡邑各壇應行修理者支動正帑估報核修至各

元和縣志

卷六 壇祠

九

壇祭器有制造未備以及歲久損壞者并遵照會

典如式修造於是蘇郡三縣合祀諸壇次第及時

修整春秋屆祀大中丞率屬行禮駿奔有恪秩祀

加隆於昔矣

厲壇在元和縣九都虎邱山寺右旁實郡厲壇也長

洲舊有邑厲壇在白蓮橋後廢因與吳縣附祭於

郡今元和亦如之累石爲壇縱橫各三丈高四尺

每歲春清明日秋七月望冬十月朔以儀從迎府

縣城隍神至請

欽依祭文祭園郡無祀鬼神府官主祭三縣官陪祀

鄉厲壇祭各鄉無祀鬼舊制每一里建一壇俗呼孤

魂壇歲清明七月望十月朔各里設祭壇高三尺

樹以松楸立碑其上周圍繚垣門一長洲縣舊有

七百四十一所若與元和分祀當不下數百所也

今皆湮廢爲民居所侵屋其上者十九僅存者亦

鞠爲茂草矣澤及枯骨此典宜興復焉

城隍廟在蕭家巷雍正四年八月里民張品倫等謂

元和既分縣陰陽一理應添設縣城隍司以昭祀

元和縣志

卷六 壇祠

十

典鳳池鄉舊有土穀張明廟乃漢朝名將也即以

兼理城隍爲宜知縣江之煒聞於府復與舉人生

員等議僉以城隍當祀而他神兼攝爲非宜移張

神於左之便殿而以正殿立元和城隍神像署其

門曰元和縣城隍之廟似屬妥洽因詳之上官皆

報可遂以其年十二月二十七日設像成禮焉

赤蘭相王廟在葑門內仁一畝土穀神也吳地紀云

神爲南面討擊將軍黑莫郝周敬王時築城而死

人呼赤蘭將軍亦呼相王或云赤蘭卽赤門之譌

相王卽伍相云

靈濟白龍廟在長洲縣陽山澄照寺其祀事元和主之相傳東晉隆安中繆氏室女產龍驚悸而死鄉人厚葬之號曰龍塚每歲是日龍必歸省母宋以祈雨應屢封龍忠烈昭應廣惠靈豐公母顯正孚順聖善妃載於祀典春秋祀之

宋胡偉元胡應皆有碑記

澹臺滅明祠在尹山麓後移建山上

亞聖祠在東禪寺西祀孟夫子並祀孟母舊在顧家巷五十三世孫松江府判官孟潼宋昭慈后姪孫

元和縣志

卷六

壇祠

土

也以祖信安郡王孟忠厚鎮吳有功請於有司改立爲祠朔性善家塾以教俗黨子森集守之後廢明萬曆中移建今處康熙間糧道劉鼎助修韓將軍廟在婁門官瀆橋將軍名說漢人爲橫海將軍與朱買臣同受詔在吳中治樓船破東越有功故祀之

朱氏忠孝祠在亞聖祠東祀漢尚書朱穆唐洗馬朱仁軌

二戴夫子祠在虎邱山東祀漢信都太傅戴德博士

戴聖二公剛定禮經有功聖學康熙二十六年督學李振裕建祠

顧元公廟祀晉驃騎將軍顧榮在黃天蕩東有墓焉故名其地曰顧榮墓祠久圯元至正間邑令周舜

臣更新之

周伯琦有記

東山短薄祠在虎邱山門內祀晉司徒王珣珣與弟珣捨別業爲寺今皆爲土神顏曰故東山廟

西山廟在虎邱山門外萬點橋西祀晉司徒王珣

五賢祠在虎邱山明萬曆戊戌邑令江盈科卽平遠

元和縣志

卷六

壇祠

土

堂建祠祀唐太僕少卿兼御史中丞韋應物太子太傅刑部尚書贈尚書右僕射諡文敏白居易太子賓客檢校禮部尚書贈戶部尚書劉禹錫宋翰林學士知蘄州王禹偁前禮部尚書兼端明殿翰林院侍讀學士贈太師諡文忠蘇軾以韋白劉俱刺吳郡王宰長洲蘇則晚年寓吳也歸宣公祠在葑門仁三畝給諫坊內公諱崇敬唐大曆中翰林學士兵部尚書封餘姚郡公諡宣子登累官工部尚書封長洲縣男諡憲父子有聲於朝

祀宣公而以憲公配焉明嘉靖間裔孫歸大道重修

甫里先生祠祀唐高士陸龜蒙也祠在縣東五十里

甫里白蓮寺卽其故宅或云卒後葬其旁遂廟食焉

宋嘉定十七年錢塘龔時甫別建祠於左胡宿有碑

元元統時裔孫德原卽是地請建書院有宣聖

殿明倫堂大小學二齋儼然學宮規制旋設山長

以教來學戴良有述甫里書院下山長序至正間縣尹馬玉麟重

建養鳴池桂子軒日久漸圯汎營居其中康熙甲

元和縣志

卷六 壇祠

三

子睢州湯斌撫吳崇尚正學於是甫里人士得奉

憲檄撤而新之蔚然復舊觀焉

魏諫議祠祀宋諫議大夫知州事魏庠至道中奏改

虎邱律寺爲雲巖禪寺因爲建祠

王翰林祠祀宋翰林學士知蘄州前長洲令王禹偁

天禧四年子嘉言復宰長洲作堂祀之後移堂於

虎邱刊蘇文忠贊於其中

知州康孝基撰碑

孫學士祠在萬壽寺宋天聖中直史館臨江孫冕守

郡有善政吏民立祠祀之今改爲縣學久廢

章莊敏公祠在報恩寺東卽宋章太師案家廟公在

涇原禦夏有功徽宗賜廟於懷德軍額曰忠烈嘉

定末其孫請立於此今爲天妃宮

周濂溪先生祠在忠烈祠西絃歌里祀宋周茂叔先

生也初先生四世孫興裔以和州觀察使駐節平

江奏立祠於吳縣胥臺鄉其裔孫文英南老自道

州來因家焉祠屢復而卒廢明正統間十四世孫

淵等遷於家顏其堂曰崇本大學士王真記萬曆中十七

世孫興爵復建專祠前堂祀先生後堂祀先生父

元和縣志

卷六 壇祠

古

以武功大夫興裔配萬曆末十八世孫希夔復建

於絃歌里以裔孫制機檢察使才秘書省檢閱文

字璵耐焉大學士申時行記春秋編祭長洲

二程夫子祠祀宋大儒明道伊川二先生也祠舊在

府學西高宗時伊川從子沂知崑山縣因故廣平

侯程師孟宅建後燬順治十七年府學教授程邑

重建於飲馬橋北康熙九年少司空程文彛時官

庶常以祠址逼隘買地虎邱而移建焉後堂祀先

生之父大中公諸生程端程永祚等又於祠後別

立一室祀先生遠祖晉新安太守元譚陳雲麾將軍靈洗散騎常侍文季唐歙州都知兵馬使漢

三賢祠在西嶺紀宋范文正公仲淹胡安定先生瑗

尹和靖先生焞嘉靖間吳文端公一鵬建湛文簡公若水

記有

尹和靖祠祀宋儒尹肅公焞初在虎邱西庵公讀書

處也嘗自題其齋曰三畏嘉定七年士人黃士毅

請於郡守陳芾通守丁煇繪像祀之後二年貳卿

孟猷改建於上方通幽軒之南端平二年胡淳請

元和縣志

卷六 壇祠

五

卽其地爲學倉司曹肅因奏立書院設四齋曰三

省務本朋來時習提舉馬述建君子堂嘉熙四年

提舉陳振孫作藏書室咸淳初提舉李芾建蒸居

堂奉先聖元初爲雲岩寺僧所據延祐元年移烏

鵲橋北郡守道童重建殿廡門堂後廢吳令汪亘

以公祠宜在虎邱仍於西庵故址重建和靖書院

三楊公祠在虎邱二山門外一名道南書院祀宋龜

山楊先生時明少保兵部尚書莊簡公成崇禎庚

午解元忠文先生廷樞康熙六十年布政使楊朝

麟建莊簡公有祠在黃鸚坊巷崇禎五年巡撫莊

祖誨建十一年巡撫張國維以莊簡公子端孝先

生大濂配享乾隆三年祀生楊柱峯請帑修并

樂圃書院在城內地三畝祀宋先賢太學博士朱長

文賢嗣進士朱發配享公沒於元符元年弟子范

純仁等建明教堂祀之寶祐三年敕建樂圃書院

元燬於兵燹明太祖時新之歲久傾圯康熙己亥

有司因其裔孫之請以慈濟庵改建西傍有忠節

祠祀宋海鹽尉朱良東傍有孝友祠祀旌表孝

元和縣志

卷六 壇祠

六

子朱之勸

盛御史祠在婁門祀明御史盛杲

康都官祠在虎邱山祀宋康孝基

蔣學士祠祀宋樞密學士左諫議大夫知州事蔣堂

在虎邱山

陳朝散祠祀宋朝散大夫行在尚書吏部員外郎知

州事閬州陳省華

葉少列祠祀宋朝散大夫尚書刑部郎中知州事葉

參

姚秘閣祠祀宋右朝散郎直秘閣兩浙路轉運判官

郡守姚憲 姑蘇志云已上三祠並在虎邱雲巖

寺乾道五年郡人立教授陳伯今廢按葉少列祠

東嘉靖初郡守
胡繼宗重建

南山書院宋宗室趙忠果公故祠也公名訓之爲吳

令多惠政後知永豐遇統制杜彥叛拒戰以歿子

貴一卜築橫谿彩雲里士庶不忘忠果舊澤就所

居構書院祀之明萬曆間督學御史柯挺按吳重

其裔孫鳳風節造廬訪謁詢所欲鳳愀然以先祠

元和縣志

卷六 壇祠

主

毀於兵燹對卽爲新之少師申時

延平李先生祠在婁門祀宋儒李靖公侗也自公四

世孫大昌徙居吳郡至明永樂四年士民仰慕儀

型建祠於縣治東後廢康熙二十八年十八世孫

堯欽捐資修婁門內社學巡撫洪之傑撤淫祠改

建

劉文靖公祠祀宋儒劉屏山先生子翬也公爲宋太

師忠顯公幹之季子少傳忠定公子羽之弟文公

朱子之師閩之崇安人以六世孫靖節公順之歷

平江樵茶提舉遂籍於蘇因有專祠年久傾頽康

熙二十五年學使李振裕改建於貞三畝李基巷

以靖節配享

總管廟在葑門外匠門塘西祀汴人金和隨駕南

渡僑居於吳其子名細官太尉沒皆爲神細在理

宗朝嘗著靈異遂封靈祐侯侯之子昌昌子元士

復皆爲神元至正間嘗陰翊海運俱封總管又進

封昌爲洪濟侯元士爲利濟侯

張忠靖祠在師林寺家廟內祀宋浙西帥幹兼樞密

元和縣志

卷六 壇祠

主

院提刑張日明

都南張公祠在乘鯉坊東祀宋平江路通判贈節度

使張日中橫渠先生七世孫建昌軍南城人端宗

朝任平江倡義衛民政績大著尋遷興化軍時文

信國公開府勤王率師以應復吉贛等州信國公

師潰公奮力拒戰元李恆麾鐵騎橫擊公身受數

創猶刃十餘人被執死信國哭之有絕域耻爲吳

地辱封疆甘作宋臣忠之句事聞配祀祖忠敏公

其子洛居吳因世享崇禎間以裔孫工部郎中適

保定知府祝福清知縣朝儀饒州通判慕渠四賢配享祠圮改建於吳縣南狀元坊

忠烈祠在乘鯉坊祀宋丞相信國公文天祥公知平江時詔天下勤王遂入衛後還平江吳城已爲元有憾憤悲悼慰撫遺民而去治吳雖不久而惠之在吳終古不可沒也明初未有專祠正德十年裔孫太僕少卿文森願以其地立祠奉祀巡按謝琛以聞詔賜廟額曰忠烈嘉靖二十六年長洲學宮既遷郡守金城以公祠湫隘不稱議改舊學爲祠元和縣志

卷六 壇祠

元

巡按饒天民以聞詔復可之族孫待詔徵明爲書正氣歌於壁萬曆間祠漸圯邑令陳其志胡士容相繼修葺康熙庚戌後裔世光又新之乙丑巡撫湯文正公斌以公裔孫待詔徵明大學士震孟配享己丑巡撫于公準率屬重葺

世宗憲皇帝七年詔發帑修古聖賢祠墓公祠得邀盛典

今上御極復降

諭旨修葺鳩工於乾隆二年訖工於乾隆三年廟貌

重新俎豆生色乾隆二十四年裔孫朝節捐資重

修學政李因培記

周孝子廟在城中東南隅孝子名容常熟人事母有至行人稱爲周孝子沒爲神能保護鄉間有驅虎除蝗救水旱攘盜賊諸顯跡宋淳熙間賜額曰靈惠祈禱接踵廟廷隘不能容成化七年里人王英募衛千戶陳俊割地以廣其址廟制始備旁浚井病者汲井投紫蘇煎飲卽瘥

禮部尚書吳寬有記

許文正公祠在甫里祀元儒魯齋先生許衡明初建

元和縣志

卷六 壇祠

三

嘉靖間燬於倭康熙八年裔孫王儼重建

原魯先生祠在婁門報恩寺東先生顧姓名愚元末隱居不仕以伊洛之學倡里中學者翕然宗之孫存仁中明嘉靖間進士官禮科給事以直諫謫戍居庸後還職卒贈太僕卿先是郡守金城建祠吳縣卧佛寺東後督學耿定向移建大石鍾繼英復建婁門以太僕卿配

周琬有記

開平忠武王祠祀明鄂國公追封開平王諡忠武常遇春吳元年開平受命討張士誠將圍平江駐虎

邱寺得免兵燹因爲立祠今廢

四賢祠在虎邱白蓮池旁祀明夏忠靖公原吉周文襄公忱王端毅公恕海忠介公瑞皆撫吳有功德於民者

五經陳公祠在縣橋巷祀明翰林檢討陳繼繼有孝行貫穿經學人呼爲陳五經楊士奇薦爲國子博士尋改翰林

周文襄公祠祀明工部右侍郎巡撫江南廬陵周忱在虎邱法堂後公撫吳十九年奏減糧額七十餘

元和縣志

卷六 壇祠

三

萬吳人德之爲畫像立祠

孔侍郎祠在東花橋巷祀明兵部左侍郎贈尚書鏞乾隆二十三年後裔孔毓義移建支硎山四圍浜

陳大中丞祠在丁香巷祀明都察院左副都御史操

江陳璠

吳文定公祠在天賜莊祀明太子太保禮部尚書吳寬

沈大中丞祠在葑門外官浦祀明都察院右副都御

史沈林

徐公祠在韓蘄王廟東祀明大中丞徐源

朱恭靖祠舊在北濠今移虎邱二山門祀明太子太保吏部尚書朱希周

周巡撫祠舊在胥門驛右今移虎邱二山門祀應天巡撫周孔教與朱恭靖祠合祭

侍御陳公祠在虎邱寺內東偏侍御名瑞福建人明嘉靖二十四年來按吳風裁中多甘雨之惠復任一載去後民多思之爲立生祠

申文定公祠祀明少師大學士申時行在虎邱第三

元和縣志

卷六 壇祠

三

泉之右專祠在城中

朱秋崖祠在文忠烈祠西祀明都御史開府浙閩朱

執嘉靖三十三年巡撫張景賢建給田一百四十

餘畝以供祀事俾其子正元世守焉今移學宮東

文待詔祠祀明翰林院待詔文徵明在文忠烈祠內

顧太保祠在舊學前醉竹祠祀明三邊總督顧其志

顧孝介祠在天賜莊祀明監察御史顧宗孟

鄧孝子祠在婁門張香橋祀明孝子鄧汝甫

陳仁錫有記

三講官祠在虎邱二山門竹亭東祀明東閣大學士

文文肅公震孟詹事府少詹姚文毅公希孟國子
監祭酒陳文莊公仁錫文肅別配享忠烈祠

蔡公祠在帶城橋西祀明御史天啓間邑令葉成章
康熙十一年改爲雙清書院合祀邑令沈恩舉二
公皆閩產均令長洲善政亦相類故並祀之

五人祠在山塘祀顏佩韋馬傑楊念如沈揚周文元

詳見
家墓

許公祠在六直鎮祀明中書許自昌

吳公祖孫合祠在仁三畝祀明太僕吳之佳兵科給

元和縣志

卷六 壇祠

三

事吳适

忠孝龔公祠在平江路中營巷祀明殉難贈助教

龔元祥孝子龔炳衡

張公祠在虎邱白公堤祀明巡撫王筍張國維崇禎

甲戌撫吳在任七年惠澤覃被庚辰去任士民德

之建祠

忠烈王公祠在大儒坊巷祀明殉難保城知縣王佐

聖

正心書院在虎邱山前斟酌橋西明崇禎十六年吳

邑令牛若麟捐資建中堂奉先賢周程子子後爲

學舍又後爲樓額曰正修講院去後士民思之於

後樓奉生位祀焉見史官徐汧去思碑記鼎革時

學舍傾圮巡撫馬祐更額正心書院

孝廉鄭敷教
題進士趙炳

書

蔡忠襄公祠在虎邱古鶴澗邊康熙二十五年建祀

明山西殉難巡撫蔡懋德

萊陽二姜先生祠祀明給諫姜如農暨弟吏部如須

給諫名琛以言事廷杖謫宣城國變不果行卒治

元和縣志

卷六 壇祠

三

命葬敬亭山下吏部名垓葬蘇州祠在養鶴澗旁

宋文恪公祠在虎邱二山門祀文華殿大學士宋德

宣

方公祠在虎邱金粟房祀分守蘇松常道方國棟

吳郡守祠在虎邱清和書院祀蘇州知府吳道煌

蔣公祠祀戊戌科進士蔣德峻祠在甫里以其恬澹

不仕有魯望風也又棄田宅施糜粥建橋梁里黨

德之建祠與甫里祠相對

顧孝靖祠在山塘白公堤祀贈河南巡撫